


⇒ Kantik Sant Philibert ⇐



DISKAN :

Sant Philibert, hor patron,
Selaouit hor peden,
Gant fizianz a greiz kalon,
Ni 'ra deoc'h hor goulén,
Varnomp, var tud hor parrez
Skuillit puill ho pennoz,
'Ma vo santel hor büez,
'Vit mont d'ar Baradoz.

1.

Yaouankik e z'oc'h kasset
Da balez ar Roüe,
Hag o peuz eno miret
Holl gened oc'h ene ;
Grit eur zell a vadelez
Ouz hor bugâligou,
Ha lilien an elez
'Vo en ho c'halonou.

2.

N'o poa nemet ugent vloaz
O tilezel ar bed,
Varlec'h Jezuz hag he groaz
Mall oc'h euz da gerzet ;
Elec'h madou danjuruz
E plij deoc'h ar beden,
Ha d'ar gouent e z'it eüruz
Gant ho mignoun sant Ouen.

TON : Breudeur ni glev ho klemmou.

3.

'Vit goudori oc'h ene,
Jumiej o peuz savet,
Jumiej eo, dré c'hras Doue,
Ho neiz muia-karet,
Hag eleiz a ziskibien,
Er joa, el levezéz,
Ganeoc'h ouz ar bec'herien
A zesko kaout trüez.

4.

C'hui zo bet ouспен eur vech
Gant kalz drouk-prezeget,
Ha, daoust ma z'oac'h direbech,
En eur prizoun taulet,
Heb en em glemm, e pedit
'Vit an drouk-prezeger,
Ha laoüen e pardounit,
'Vel ma reaz hor Zalver.

5.

Mez ma z'eo braz ho touzder,
Eo braz ho nerz-kaloun,
Rak d'eun tyrand, he zever
A ziskouezit heb aoun :
« Ebroin, oc'h euz lavaret,
Roit d'an Iliz ar peoc'h.
Pe justiz Doue kounnaret
A gouezo stard varnoc'h ».

6.

Siouaz ! 'vel guechall Ebroïn,
Tud fall en hon touëz
A ra d'al lezen divin
Eur brezell didruez ;
Ho sikour a c'houlennomp
Evit difen hor feiz,
Ma vezit ato ganeomp,
Den n'he zenno deuz Breiz.

7.

En enezen Noirmoutié
O peuz pell-braz bevet,
Eno servicha Douë
'Zo bet ho c'hoant bepret,
Ar brud euz ho vertuziou
A dreuz ar Frans a bez,
Donezoün ar miraklou
A verk ho santelez.

8.

Unan a ioa hir amzer
O c'houazaon kalz a boan
Gant eur güentl ken dizesper,
M'oa var he dremenvan ;
Sin ar groaz a rit varnhan,
Pebez burzud ! Kerkent
An drouk a dec'h diouthan,
Yac'h oa 'vel diagent.

9.

Martolodet euz hor bro,
E spount hag en anken,
'Ioa e danjer a varo,
Tostik doc'h enezen,

Ganeoc'h int bet diouallet,
P'edont holl heb skoazel,
Diouallit c'hoaz, ni ho ped,
Martolod Breiz-Izel.

10.

C'hui a zo skeduz er c'hloar
Gant ar Zent en Envou.
Mez ganeomp var an doüar
E chom ho relegou,
Eul lodennik anezho
'Zo bet roet d'hor parrez,
Eun tenzor braz e vezo
Da gaërat hor büez.

11.

Ia, ma zoc'h bete-vrema
Ken douz en hor c'henver,
Eo red deoc'h neuze beza
Eun tad muioc'h tener,
Netra ne c'hellit refus
Hirio d'ho pugale,
C'hui 'pezo digant Jezuz
Peb mad 'vit hon ene.

12.

Sant Philibert benniget,
Dreist-holl ni a c'houlen
Beva bepret unanet
Gant al lezen gristen,
N'or beuz nemed eur galon
Ama d'oc'h henori,
N'or bo nemet eur galon
Er bed-all d'ho meuli !!!

Imprimatur :

F. CORRIGOU, Vic. gén.

19 Juillet 1901.